

四庫全書

集部

欽定四庫全書

集部

吳文正集卷

九十至
九十四

御史^臣邱文愷覆勘

武英殿纂
侍讀臣陳嗣龍

欽定四庫全書

吳文正集卷九十

元 吳澄 撰

制

封張蔡國公制

天地間之有正人國家恃以為元氣卿之忠蓋朕所眷
知此因疾以祈閒爰加恩而優老榮祿大夫中書平章
政事張珪彝常世閎廊廟宗工早總戎旃已作禮樂詩

書之帥晚司化軸遂稱文學正事之臣左右六朝出入
三府夷險不易其守鯁亮一如其初太清罹薄蝕之昏
前期致沐浴之請越予新服嘉乃舊勲諤諤之節詎敢
詭隨侃侃而言類多裨益黷雖謁告與尚勉留俾辭鞅
掌之勞專罄格心之學緬維先正嘗平金壘以立功宜
得後昆復就蔡封而襲爵所謂故國庸建上公思竭爾
忱庶敷陳於經幄欽承時命永翊贊於皇猷可封蔡國
公提調經筵事

封天師制

我國朝之崇玄教古莫與倫卿世家之受皇恩今為特
盛宜隆稱號爰示寵嘉正一教主嗣漢三十九代天師
太玄輔化體仁應道大真人主領三山符籙掌江南道
教事張嗣成冰雪神人風雲聖代繼乃祖乃父累功積
行於前而聞子聞孫繼序增光於後及此初元之覲助
予敬德之祈翼翼小心允謂恪恭而有禮巍巍大道共
祈清淨以無為可特授翊元崇德

職事同前

知集賢院

道教事

封仙姑制

朕惟下之事上也以禮上之答下也以恩朝宗于國者
禮之恭慶賞其家者恩之厚嗣漢三十九代仙姑胡靜
正出自右族克相中閨宜錫佳稱用嘉婉美可授明惠
慈順仙姑

封孫真人制

大道先天地而混成至德正性命而順受其能凝神守

一則可保身全生我家啟運之初異人乘時而出素行
上孚於睿鑑玄功下濟於寰區繼繼逮今繩繩嗣教以
爾泰定虛白文逸真人孫履道恬淡抱璞謙冲葆光方
外從游早逍遙於冀北環中善應晚楷式於豫南屬長
春之席藪虛幸太古之傳未泯遠尋支派丕闡宗風可
特授神仙玄門演道大宗師泰定虛白文逸明德真人
掌管諸路道教所知集賢院道教事於戲心齋而有吉
祥爾懋明於寧極年熟而無疵厲朕永賴於蕃釐宜令

孫履道准此

誥

追封秦國公

巨姦蒙蔽誣陷忠良大號渙頒昭蕪冤枉允諧公議宜
錫殊恩故開府儀同三司上柱國上都留守兼本路都
總管開平府尹虎賁親軍都指揮使賀勝光輔五朝榮
躋一品謹論屢陳於中禁重權久畀于上京疾惡如仇
遑恤後來之身禍觸邪獨早孰知先見之神機敬輿本

欲摧延齡之鋒彥範不幸死三思之手粵予嗣服閔爾
罹殃誕播告于寰區用慰安於泉壤褒崇有典開釋無
辜進稱社稷之功臣疏封井鬼之分土服此爵命施于
子孫可贈推忠宣力保德功臣太傅開府儀同三司上
柱國追封秦國公謚惠愍主者施行

追封張氏奉國夫人

夫妻牌合也禍福同之爾夫勝累朝舊臣忠勤脩著不
幸忤雄姦受誣構以至於死朕甚閔焉亦既昭雪優加

褒贈爾尚與享其榮哉故某官某妻張氏可贈秦國夫人主者施行

追封捏古真秦國夫人

朕有忠臣罹此誣構爾為良配失所依歸死者既用褒嘉生者亦宜矜恤貴崇天爵榮受國封施及未亡人以風天下之俗享明乃服命是曰邦君之妻尚克有終欽承無斁故某官某妻捏古真可封秦國夫人宜令准此主者施行

表牋

謝賜禮幣表

伏以接地風雲際會親逢於明主麗天日月照臨遠及
於老臣賜之以府庫之財衣之以筐篚之幣承恩過厚
揣分何堪俯瀝愚衷仰塵睿聽臣誠惶誠恐頓首頓首
伏念臣荆揚賤士樵牧孤蹤幼誦孔氏之遺書無繇見
道長直朝家之興運有幸為民愧碌碌之謏才乏卓卓
之奇節以言其文章則體格卑陋以言其學行則器識

凡庸自甘晦跡於深山豈覬發身於昭代大鈞靡不覆
燾小物亦預陶鎔惟成宗法至元首賁邱園之隱歷武
宗逮延祐薦升館閣之華先帝擢之禁林今皇處之經
幄講讀古訓對揚耿光誤蒙上聖之簡知得廁羣賢而
布列然犬馬餘齒已非少壯之年而螻蟻微誠莫展驅
馳之志外之弗能效勤勞於郡縣內之弗能裨謀議於
廟堂糜廩粟費俸錢素餐甚矣辱高位速官謗清論凜
然因負采薪之憂遂辭視草之職雖心同葵藿常戀闕

庭柰景迫桑榆宜歸田里未嘗毫釐有補於國况又耄
耄無用於時淵度涵容寵錫優渥茲蓋伏遇皇帝陛下
乾坤博施海宇皆春忍令散材汨沒於泥塗欲俾寸草
沾濡於雨露閔憐周恤固君父惻隱之仁惻款控陳乃
臣子辭讓之禮倘冒昧而拜貺實踧踖以懷慙敢致懇
祈乞垂矜允收此九重之大惠全其一介之小廉一是
歡榮等如祗受臣栖遲畎畝固難彊筋力以輸忠教誨
子孫誓當竭精神而報上所賜鈔錠段疋除已嚮闕謝

恩外未敢欽受謹奉表辭謝以聞臣無任瞻天仰聖激切屏營之至臣澄誠惶誠恐頓首頓首謹言泰定三年某月某日具官臣吳澄上表

擬賀正表

祥開鳳曆三年書正月之春喜溢龍墀萬國慶九天之拜朝廷有道臣庶齊心中賀孝友慈仁聰明睿智敬上帝而尊祖考怡太后以及族親正始厚倫式昭風教之本更化善治茂迎福祿之來際熙洽之昌辰舉會同之

盛典某致身胄館稽首宸居日月照臨祝聖人之悠久
乾坤交泰值君子之吉亨

賀正牋

黃道天開曉麗彤墀之日青宮地近春隨紫禁之煙禮
盛三朝歡騰八表中賀因心則友令德維恭建宗社之
殊勲不矜不伐膺軍國之重寄克讓克仁隆孝養於慈
親廣緝熙於聖學前星明潤正月會同某教掌貴游光
依儲極始和布六典聿新象魏之觀元良貞萬邦尚念

虎闥之齒

擬賀登極表

聖人冠世久屬天地臣民之心歷數在躬宜為宗廟社稷之主六龍御極萬象回春中賀睿智挺生武文兼脩維太祖肇洪業而世祖一寰區其雄畧宏規偉曾孫之克肖矧英姿粹學與先哲以同符爰自邇年首平內難試斧鉞於盤根錯節措邦家於磐石太山翕然人望所瞻依迺以天倫而推讓潛毓震宮之耀順承坤母之慈

上帝公而無私太寶昇于有德不崇朝而致泰姦慝悉
除如皎日之方升幽微畢照聿新善政深愜輿情僉云
遭逢堯舜之君何止超越漢唐之治某等濫班端尹幸
際昌辰附翼攀鱗豈敢作榮身之計責難陳善尚期攄
報國之忠

賀皇后表

天德出寧覩乾龍之有造地儀克配同坤象之無疆海
宇咸歡宮闈溢慶

中賀

柔嘉體順恭儉性成伉儷前星

久仰星軒之協比光榮今日欣逢日馭之昭升用宏闡
睢正始之風共佐鳬鷖太平之治某等叨陪清列獲覩
皇明利見大人為祭主而守宗廟樂得淑女嗣徽音以
御家邦

擬皇慶賀正表牋

二道

元年正月朔新歷數之初麗日中天咸集衣冠之拜照
臨所暨悅豫惟均陛下明睿冠倫緝熙典學持守臻太
平之盛怡愉盡致養之歡衆賢聚於朝廷政修事舉利

澤周乎宇宙吏稱民安庶績彙升三陽道泰某職司虎
胄光近龍墀皇極敷言喜一人之有慶臣工稽首祝萬
壽之無彊

體元資始先天茂對於乾時積慶有餘厚德實基於坤
母和開正旦喜溢重闈皇太后雖肅在宮慈儉為寶上
致隆於孝養內昭嗣於徽音維長發之降祥篤生濬哲
以思齊而興聖駿惠家邦春暉融撫育之仁國典脩尊
榮之禮某濫司六館幸際三朝儼千官朝會之班肇端

此日享四海怡愉之奉萬億斯年

經筵講議

帝範君德

夫民乃國之本國乃君之體人主之體如山嶽焉高峻而不動如日月焉圓明而普照兆庶之所瞻望天下之所歸仰寬大其志足以兼包平正其心足以斷制非威德無以致遠非慈厚無以懷人撫九族以仁接大臣以禮奉先思孝處位思恭側已勤勞以行德義此乃君之

體也

唐太宗是唐家很好底皇帝為教太子底上頭自己
撰造這一件文書說着做皇帝底體面為頭兒說做
皇帝法度這是愛惜百姓最緊要勾當國土是皇帝
底根本皇帝主着天下要似山嶽高大要似日月光
明遮莫那裏都照見有做着皇帝天下百姓看着都
隨順着行的好勾當呵天下百姓心裏很快樂有行
的勾當不停當呵天下百姓失望一般志量要寬大

着寬大呵便容得人心要平正着平正呵處得事務
停當非威武仁德這田地國土怎生肯來歸附非慈
愛忠厚的心百姓怎生感戴皇帝的宗族好生親愛
和睦者休教疎遠者朝廷大官人每好生祇待休輕
慢者奉祀祖宗的上頭好生盡孝心者坐著大位次
裏好生謙恭近理休怠慢者揀好底勾當盡力行者
這是做皇帝的體面麼道

通鑑

漢高祖至咸陽悉召諸縣父老豪傑謂曰父老苦秦苛
法久矣吾當王關中與父老約法三章殺人者死傷人
及盜抵罪餘悉除秦苛法吏民按堵如故凡吾所以來
者非有所侵暴毋恐

漢高祖姓劉名邦為秦始皇二世皇帝的時分好生
沒體例的勾當做來苦害百姓來漢高祖與一般諸
侯只為救百姓起兵收服了秦家漢高祖的心只為
救百姓非為貪富貴來漢高祖初到關中喚集老的

每諸頭目每來說你受秦家苦害多時也我先前與一般的諸侯說先到關中者王之我先來了也與父老約法三章殺人者死傷人及盜者隨他所犯輕重要罪過者其餘秦家的刑法都除了者當時做官的做百姓的心裏很快活有大槩天地的心只要生物古來聖人為歹人曾用刑罰來不是心裏歡喜做來孟子道不愛殺人的心廝似前賢曾說這道理來只有漢高祖省得這道理來漢家子孫四百年做皇帝

我世祖皇帝不愛殺人的心與天地一般廣大比似
漢高祖不曾收服的國土今都混一了皇帝依著世
祖皇帝行呵萬萬年太平也者

吳文正集卷九十

欽定四庫全書

吳文正集卷九十一

元 吳澄 撰

韻語

五言四句

感興詩

二十五首

至元丁亥自京師回舟中寄子昂及在朝諸公

圓氣直似專方形翕還闢眇眇血肉身中立名三極

又

天運比日舒月行比日徐舒縮生歲差徐疾成閏餘

又

岱霍嵩華恒濟淮江河海昆侖歸虛谷萬山萬水會

又

氣火血脉水骨金毛髮木五行皆有土四物載於肉

又

馮圖龜文書麟獲鳳不至萬世炳文明四靈兆開閉

又

洪流啓三聖烈炤顯六籍世間土水偶不度水火厄

又

先天竟岐周古文起東晉四家一孤行五傳三難信

又

冀北盛堯禹雍西大文武洙泗東極天春陵南教祖

又

臨川捷徑不新安循堂序本堂近定慧末失墮訓誥

又

新安窮格功臨川脩省處三人有我師况此衆父父

又

老聃南國學西出流沙外釋迦西方來南入閻浮界

又

老氏巧處事任術以為理釋氏嚴治心絕物以勝已

又

墨翟名宗禹揚朱實師老本主雖不同一是畔吾道

又

長氏原道篇董生正誼語唐宋千年間微子吾誰與

又

周詩三百餘楚騷二十五自從蘓李來萬變莫能古

又

周召分方伯鄼留著世家西山二子薇東陵故侯爪

又

子房為韓心孔明興漢事三代以後人卓偉表萬世

又

楊雄葬大夫陶潛晉處士男兒百歲中蓋棺事乃已

又

批導卻窾際出入齊泊中解牛與蹈水萬理一道同

又

千金屠龍技百金不龜樂一壺濟中流五石嘆濩落

又

漢皇棄梁傳鄭公負唐帝君臣際會難禮樂竟淪廢

又

箕疇八政目未師首食貨井田封建後此事如何可

又

踰濟巢鳩鵲入洛啼杜鵑大事可知已禽鳥得氣先

又

元后宅土中神皇主天下書傳三千年未有如此者

又

風前白浪惡雨後黃流渾公無渡河去天未喪斯文

題諸葛武侯畫像

含嘯沔陽春孫曹不敢臣若無三顧主何地着斯人

題陶淵明畫像

淒涼義熙後沈痛永初元天闊目無力相隨酒一尊

跋畫歸去來辭

當時歸去意難與世人知未信千年後能知有畫師

題伏生授書圖

有跋

先漢今文古後晉古文今若論伏氏功遺像當鑄金

嗚呼天未泯絕帝王之制故慙遺此老以至此時也

女子亦有功焉書二十八後折為一十三奇倔難讀
或謂女子口授時濟南潁川語異錯以己意屬讀而
失其真嗚呼奇倔古書體也錯何尤晉隋間古文二
十五篇出從順如今人語非若伏生書奇倔矣識者
議其功罪於錯為何如哉烏乎是固未易為淺見寡
聞道也安得起吳材老朱仲晦于九原

題馬義望雲閣

望雲空想憶愛日莫蹉跎游子歸與未吾親念若何

題高節婦詩卷

桃李盛芳年貞心不二天如何丈夫輩大節少能全

徐節婦秘氏詩

二首

婦德貞從一鄙風首拍舟卓哉徐氏母磐石屹中流

又

家無丹穴利誰與築懷清一二文儒士依稀說姓名

題漁舟風雨圖

簑笠寒颼颼一篙背峯曲有人方醉眠酒醒失茅屋

題張鶴溪萬里風行卷

忽逢萬里風吹上一隻鶴臨川故鄉溪悠悠水如昨

題琴士戴天聲贈言

耳未聞其琴而已知其音目未見其人蓋已知其心

題王明遠筆

齊銳久如新文場策上勲誰言斗邑小有此管城君

題雙頭菊

天下無雙士風流靖節翁如何名利域有此兩心同

清隱軒

為梅泉毛使君題

冰雪淨無塵風波澹不起眼中世緣斷疎影在淺水

題雙鵲圖

寒夜鬼車飛雙栖寄一枝不逢晴曉語誰信解先知

蘆鴈

飛噉逐西東亂投蘆葦叢若無稻梁意雲外附冥鴻

題姚竹居畫卷

竹居昔過此荏苒三十春此畫今到眼見竹不見人

題陳舜卿龍頭

龍有真有畫畫無真無假畫好即為真題字從渠寫

月鏡相面兼揣摩骨

見面未見骨逢人工揣摩會湏能照膽此鏡不湏磨

贈野碧葉相士

野客雙瞳碧一如秋月明九淵深莫測容或有潛形

蘭意為艾生賦

甲子三日

古來十二操魯叟意誰傳不采又何怨幽芳祇自妍

畫猿

前者據石安後者攀枝危安危兩不知抱子相與嬉

題楊妃病齒圖

齒痛自顰眉君王亦不怡此癡如早割何待馬嵬時

玉田詩為詹道士作

一寸虛閑地中含渾沌天誰能剪荊棘日暖自生煙

送洪士芳遊廬山

匡廬萬仞立今古幾人遊更豁空中眼須登最上頭

題金牛供佛圖

憐汝山中苦殷勤飯一盂阿誰知飯味汝意亦憐渠

吳文正集卷九十一

欽定四庫全書

吳文正集卷九十二

元 吳澄 撰

韻語

題太祖太宗蹴鞠圖有陳希夷趙韓王及二侍
詔

混元共戲一九圓年在庚申啓運前賢聖仙凡俱泯泯
於今七度見流年

驛舟過慈湖瞻禮丁侯廟

往年曾此拜祠前
歸侍慈親十二年
今日重來哀罔極
西風老淚濕征船

題山水手卷

家在江南山水村
黃塵陌上兩眸昏
偶然此景夢中見
歸路迢迢欲斷魂

題黃冠師出示手卷

江山煙樹渺幽居
玄妙真師出此圖
師亦有居何處
覓

可憑畫手寫來無

題聚星亭畫屏贊 二首

真人此日暫東行
爭奈黃星漸次明
二姓聞孫竟如許
一天瑞氣落西營

又

魏公勛業照乾坤
太史曾占五色雲
三教家詩裏淚
始知亭贊意殷勤

題梅堊圖

姑射仙人識面來偶然有見却驚猜誰家埜月模糊影
絕憶前時雪裏開

題墨蘭圖

赤節紅芳楚澤春心期千載一靈均不知何代為茅去

誰認高枝細細紉

稽本草圖經楚辭辨證
通志昆虫草木畧故云

題畫山水扇面

一搦山川掌握中人間何處不清風水邊林下千年意

萬里扁舟五畝宮

題徐滁州種德堂

并序

其父光山令及侯俱嘗於師旅之間饑饉之年
有所全活

徐侯世德活萬命光山新播侯耘治種之成實實更種
穰穰今茲復來茲

題桃源春曉圖

矇矓曉色破初春一洞桃花樹樹新此景世間真個有
只今去作捕魚人

贈壺中仙談命

春花洞樹各姪妍墮溷飄茵亦偶然何事壺中太多管
謫來塵世勘流年

贈樂天術士談星命

二首

大冶鎔金鑄萬形洪纖好醜各圓成不然順處渾無事
底用逢人說悴榮

又

用之為緯體為經七緯分靈作萬靈禍福冥冥休苦問

且從義氏較中星

有示余六一公故履者為題一絕

醉翁足跡已青原
驚見如今雙履傳
古物只須存集錄
遺蹤一字可千年

文信公崖山贈歐陽伯雲詩

主亡國滅此何時贈
別從容尚有詩
心畫心聲俱軟美
心如鐵石只心知

奉題樵雲吟藁以畀其子

讀盡樵雲野叟詩
樵歌猶似入雲時
歌聲未共樵柯爛
底處樵家有此兒

贈况鈞赴澧州天門教諭

一塵不染天門竹
百世猶芳澧浦蘭
子去三年容易過
好留二物久相看

題呂公干謁不過手卷

持鉢空歸雪滿天地
爐幾日斷炊煙妻兒
不作啼號態
剛信爐灰冷復然

題伯時馬

驍壯雲連力氣麤慣看馳突暗中都如何得此真龍種
消得千金買畫圖

寄譚提舉

三首

幾年客裏負黃花此節歸來始念家
遙把黃花為公壽
秋香耐久晚尤嘉

又

人間福德似公稀底用紅塵着脚為
歲歲長如今日好

湖邊風月足娛嬉

又

一中春意造元和常樂常安孰敢魔個是法門真不二
本來無病惱維摩

次韻張廣微贈金谿祝自牧過撫遊洪

二首

偶逢此客憶文安繞櫝重重襲莫千儘是深藏藏不得
斗間紫氣有人看

又

龍虎山頭香滿衣
紫玄洞口故飛飛
仙家有藥度一世
更向何方採取歸

贈黃相士

華山一覺睡初回
雜遝門前貴客來
亦有麻衣道人至
地爐欲罷却無灰

贈曾耕野談星命

二首

黃犢青囊隴上春
低頭自樂可終身
觀星只用占風雨
底用窮通管別人

又

巧將握筭換犁鋤不履郊原履要途
西舍東鄰秋熟好
歸尋耕地恐荒蕪

跋牧樵子蒲萄

芸香樓上汗成珠起趁清風為掃除
見此西涼甘露乳
冷然齒頰出寒酥

題洞賓像

大地虛空共一鎗煎烹元不費煎烹
安爐立竈燒凡火

狡獪聊愚老樹精

贈地理者

天下名山多被僧占靖上人今以正法眼償行
脚債將又搜扶無遺臨川山主為賦二十八字
還省海印出參雪庭共發一笑

真龍正穴何人識走遍閭浮無處覓現前只在眼睛中
笑倒如今容易得

贈相士張月蓬仍其父號

二首

好醜榮枯一照中有人曾識月蓬翁翁騎蟾去兒來也
又載前時月一蓬

又

江海餘輝月一舸水天無滓見秋毫九淵深處明如晝
誰信波流巧遁逃

玉謙道惠茶惠墨不受次韻酬之

二首

不受東風不惹塵清都瑤草一庭春
睚情牢落無魔到閑却扣門傳信人

又

曾被烟煤點染來幾年洗滌淨塵埃玉環自惜天然白
肯要玄玄處士媒

移疾寓富州清都觀次韻朱元明送巖

倦思渾如焦穀芽病餘無力到君家分來紫巖長如許
欲向故山看麥麻

送星學張雲臺

曾到清臺問五雲授時歷法更精新江南今有張太史

定許他年繼鄧陳

贈全陽道人

濁陰有礙總銷鎔
地水俱無只火風
全得獨陽猶是有
一無所有是真空

題十八學士登瀛洲圖

秦府開基萃勝流
一時傾慕比瀛洲
瀛洲渺渺在何許
我欲乘桴海上浮

題雪洲圖

向來洲上雪漫漫
僵倒詩人一屋寒
洲在雪消人亦徙
畫圖猶作雪中看

題程鶴心風枝晴梢雨葉露幹四竹

日曬風搖雨露竿
一般清意在毫端
當時老鶴歸何處
留取清陰百世看

寄題無波亭

長江遠壑幾颼迴
雪屋銀山巨浪摧
寂喜此中澄一鏡
微風不動月常來

題巫峽圖

生平想像高唐賦不識巫山十二峯
忽有奇觀來眼底一時疑是夢魂中

題秋山晚眺圖

西風醉帽倚斜暉詩思山情萃一時
一轉頭間無覓處却尋舊畫要新詩

送國子生與貢充學正謁告歸省親

盤盤朝暮八年中歸袂颼颼受朔風
已是春官新貢士

宦成更自有新功

題許氏樂善樓

百尺高樓俯瞰時眼前羣動總卑卑
自家習次有如此直恐世間渾未知

題遺山鹿泉新居詩後

二首

宋氏南還金土中一時文物盛華風
煌煌帝室龍興後流落遺山老禿翁

又

新居當日占新泉
不見新居見舊篇
一代風流今已矣
空餘心畫尚依然

題半月芝蟾畫卷

紫芝偃蹇抱蟾蜍
天上求之此景無
看取初弦半規月
阿誰曉會寫成圖

題曹農卿雙頭蓮圖

二首

天光水鏡淨泓然
燦爛心花發瑞蓮
認得一茄雙齒落
千枝萬蕊一根連

又

花中君子瀟溪獨分作河南二鄂華天為有兒雙秀發
送將此瑞到公家

題九鷺圖

自飛自息自升沉各飽魚鰕各稱心世外冷冷風露潔
還知別有九臯禽

題漁舟圖

岸柳青青岸蓼紅兩兒兩媼兩漁翁當年應笑扁舟客

月夜西施一席風

題雙雉圖

一昂一俛意閒閒未覺幽棲飲咏慳竹實儻能來彩鳳
也應寫入畫圖間

題山寺圖

青山綠樹色明鮮橋有行人渡有船諸有悉歸無色界
試投山寺叩金仙

題郭學士衛州墜馬贈鑒人序後

三首

世人應無折臂公豈無奇術嗇奇逢頗隣衛子憂傷絕
密禱區區諛祝宗

又

一蹶非人馬則然扶傷效速賴鑿仙從今閒却鑿仙術
只向危途緩着鞭

又

不要黃金寶藥囊酬功合得漢文章他年詔問持將去
可附蒼公傳左方

題錦屏史仙繡牛圖 三首

平原君像何人繡費幾千絲似髮綢可是史仙能狡獪
聚毛繡出下邳侯

又

有毛無草毛安傳傳上田單形彩繒陸放水浮俱幻影
底須拽鼻着長繩

又

為汝前身膽氣麗却將假合化真如雖然毛色皆如舊

悅草觸人心已無

題皮如心行囊中畫竹圖

疇昔江鄉識此君清風凜凜動霜筠被誰點染移將去
也受京華半面塵

題愛蓮亭

二首

小亭倒影蘸清漣萬斛香風一沼蓮千載有人同此愛
試於花外契真傳

又

看花妙悟出天然有藕有荷方有蓮認出箇中端的意
生生不盡億千年

題嘉瑞亭

二首

傳載三株紫荊合詩吟五鬣老松連更將韓子同心頌
題作李亭嘉瑞篇

又

植楊雙本却駢柯瑞氣熏蒸萃一和誰着玉川奇恠筆
為歌同異異同歌

題武宗元洗耳圖

一般垢淨總成虛有耳無聞垢自無誰道清流堪潔耳
水中更是納羣污

題董元山水圖

帝里春風二月天黃塵十丈暗鞍韉蒼蒼萬木煙雲裏
何處山川到眼前

贈術士盧易仙 二首

上古神皇已泄天後來文更畫成圖無端拈出參同說

從此人人會得仙

又

今代盧敖有後身
多多狡獪妙通神
何時何處杏林驛
一笑相逢契悟真

題相師周可山

三首

聲撼江湖四十春
相逢盡道眼如神
天機難可分明泄
密付華山高卧人

又

相術通靈詩亦靈攝將詩卷上天庭豈伊暴客能持去
定是天官遣六丁

又

月眼窺人大賽明妖墓蝕月是何形世間醜好各中半
只合教君一眼青

贈心天教授

三首

撰得藍袍自誤身想緣多口泄天真如何不閤差除筆
又把虛名誤別人

又

問君方寸大如何
柳子中間着大羅
却笑詩人心似錦
秋旻耿耿衆星多

又

八月西風淨路塵
乘槎更可問天津
歸來袖得天孫石
正好回頭訪隱淪

贈碧潭相士

偶前出去偶來歸
今昨何分是與非
可笑當時錢學士

誤將天壤示麻衣

題金石編

萬里歸來始見梅
忽逢奇士笑顏開
折梅付與君簪去
何日簪梅君再來

送蕭一真

不到韶溪十八年
春園桑苧暗春烟
蕭翁孫子來相過
忽憶而翁一愴然

追和李侍郎工絕句

二首

當時得得造梅邊七十年餘又八年墨蹟流傳存石刻
子孫省力護陳編

又

弟兄八世叙同宗逾遠逾疎隔幾重世世自便綳紉賤
安知此去不分封

贈花秀才談命數 二首

幾度花開幾度春忽然爛熳忽埃塵眼明識得花生死
徧洛城中只十人

又

數皆前定定無差一樣春風萬樣花
不要開時分品第
好從根上識萌芽

贈曹山人

曹家師範兩劉家一會傳神一撥沙
算法精工如筆法
點睛點穴兩無差

題蹴踘圖

并序

錢舜舉云青巾白衣趙太祖對蹴踘者趙光普

也衣淺褐者太宗衣黃乃石守信衣白而烏巾
垂於項乃黨進高帽年少者楚昭輔也此本舊
藏御府兵火流落人間白摹倣以遺好事之君

子

聚戲人間混等倫豈殊凡翼與常鱗一朝龍鳳飛天去
總是攀鱗附翼人

題逃禪翁梅畫梅詞後

二首

小圃梅開能幾時只餘豆粒綴青枝禪翁壽得花如許

二百年來雪月姿

又

天與才情箇樣清
前身端是老梅精
妙詞難作人間唱
夢裏羅浮翠羽聲

題溪南烟雨圖

小小溪南五畝宮
等閒袖子睇遙空
春風楊柳梧桐月
絕似垂竿煙雨中

道君十八鶴

得伴天上碧空世間凡羽詎堪同如何也解亡人國
漫想遺民哭懿公

錢舜舉弁山雪霽圖

錢子心清似太湖筆移西蜀入東吳使君得此成三絕
好共梅泉作一圖

和遂公謹

蕭然非俗亦非僧尚被紅塵浣姓名辜負東籬今歲菊
客牕曉枕聽鷄鳴

題僧圓澤託生圖

浮泡散作大海水
皎月長留萬古秋
幻滅如何重起幻
不騎獅象却騎牛

題王氏留春亭 二首

生香不斷氣和柔
不在千紅百紫稠
只憇園林光景好
一春萬古鎮長留

又

先番物舊後番新
來往無停似轉輪
年去年來年自去

此中日日一般春

題韻答破衣和尚

選官選物一般般
會做官時佛喜歡
端坐府中無少怠
等閒統攝百司官

贈星學鄧雲樓

尚憶前時太史家
至今名姓滿天涯
雲樓也是雲臺族
秘斷真傳定不差

題寒雀圖

更無樹葉可因依有啄能鳴慙與誰閉口雙棲聊自暖
怎知宿處是寒枝

題馬圖

豈是雄心要疾奔不悲健足作閒身勸君底用牢牽挽
付與沙場騎射人

四偈奉寬齋居士

箇裏無邊無量在寬齋寬處天來大縱饒芥子細如毛
也着恒河沙世界

又

居士勤勤勤禮拜來拜去招雲恠忽然一日發顛狂
丈六金身都打碎

寄題栖碧山

棲碧山前有逸民愛山終日與山親幾番晴雨青如故
人不傲山山傲人

題山水圖

遠樹疎林暎晚霞江心鴈影度平沙誰人寫我邨居樂

付與岩泉處士家

自然道人賣藥都市因賦小詩

透得玄元竅上闕掃除凡疾又何難
族豎用藥不相契一笑携書歸故山

題雅集圖

官清無事足優游下馬長楸作勝遊
濟濟衣冠唐盛世諸賢不減晉風流

題郝陵川鴈足繫詩後

忠貞信使早許國羈旅微臣晚見詩追憶當時如一夢
濡毫欲寫淚交頤

題忻州嘉禾圖

并序

燕人湯侯班為忻州守廉勤明恕民氣大和天
地之氣感而降祥焉一年之間遠近屬民以禾
黍麥麻之瑞獻者十八以木草果蓏之瑞獻者
凡九害物之狼食苗之蝗皆去其境異哉或以
畫史所圖嘉禾等瑞二十七事示予為賦七言

詩二章

嘉禾異卉瑞重重
狼走蝗飛出境中
可是賢侯多美政
民和潛與地天通

又

天賞循良有異能
故將諸物表休徵
作圖合叩天關進
閤吏佯聾喚不應

題湖山卷

彭蠡匡廬甲天下
更從何處覓湖山
澄然不動屹如止

一勺一卷中自全

題和靖觀梅圖

一枝春信到孤山
冰雪肌膚不覺寒
月下水邊看未足
折來更向手中看

永豐毛月屋及其子拱辰俱善談星數
往往能奇中索詩為賦二十八字

而翁到老談星數
有子談星絕似翁
我已厭人期禍福
只將凡事付鴻濛

獨醒吟四首為友人張大亨作

未必靈均酒量慳
獨留醒眼看駝顏
幾多酒不濡唇者
長在昏昏醉夢間

又

五柳應殊五斗伶
精神千古印湘靈
當年飲酒終身醉
直到于今心獨醒

又

高門有酒滿如池
沉浸朝晡恍不知
恠得此中容此客

坐觀人醉獨支頤

又

若人才調世之珍
謠詠雖多意轉親
羣飲儘堪同一醉
如何要作獨醒人

次韻奉答元鎮內翰省郎

三首

駟騎飛來造敝廬
手持一札十行書
驚殘蕙帳遽遽夢
又報仙人得異除

又

畎畝躬耕一幸人如天洪覆沐皇仁陽和不擇肥饒處
粧點閒庭碧草春

又

豈有才猷可濟時衡門只合老棲遲一朝騎馬聽鷄去
先達曾聞識者嗤

題金魚塘阡表後

孝子工為不朽謀百年阡表至今留聞孫更勉光榮業
要作名兒第一流

延祐三年丙辰十有一月甲子詩贈武當山月

梅道士 二首

顯德年間舊丙辰武當舊隱有高人高人一去睡來覺
丁巳重來第七春

又

武當道士能風鑑定是希夷身後身閱遍王門廝役了
塵中還見出塵人

方壺圖 二首并序

蒼厓周氏為其徒羅季安畫方壺圖且畀故相
信公遺墨二紙連作一軸臨川吳某賦詩曰

信是蒼厓畫作仙等閑幻出小羅天
太師鐵畫家藏舊雲黯煙昏四十年

又

忠臣死去去成仙住在方壺大洞天
此境移來落塵世也留遺跡伴千年

寄題洪氏碧潭

泓然一勺謾窺臨
陡覺沉沉萬丈深
箇裏有天如許大
碧天盡處是潭心

戲筆依韻奉答武當皮道士

二首

十分光滿十分神
一度花開一度新
黑暗裏頭明不滅
沍寒時節暖先春

又

光清花白雖然好
非月非梅更可人
處子嫦娥冰雪質
武當山外貌姑神

贈月矚相師

蚌胎入月幻玄珠
美子雙矚黑漆如純墨
中間明似月
應無白眼向凡夫

贈碧溪相師

溪水無心管是非
臨溪照影笑山鷄
滿身文彩翻成誤
虛影何堪炫碧溪

彭澤遇成之之京都

有序

予有集賢之命與修撰虞伯生俱乘驛而北於

彭澤解后曹成之訓導將觀光上國為賦此

人海茫茫名利場盛年快意一觀光
顧予白髮歸來晚
羞過淵明五柳庄

贈周楊遺墨

周楊諸老流風遠生死交情一永年
家有聞孫善持守
十三幅紙至今傳

題湯氏賑飢手卷

有序

當饑歲賑饑民此仁心義事也
盱江湯氏其蓄

財下下其好施上上自比閭黨遂以至千里之
外萬里之內詩而美之者什什百百而猶未也
世間陰德少人知顯在他年報應時好是湯家行一善
喧傳萬口有聲詩

瓶梅圖

姑射仙人冰雪姿壺中表裏瑩無疵合供天上瓊樓供
不要人間俗子詩

劉商觀棋圖

局局更新局局奇誰將摹刻到今時坡仙可是世緣熟
劉李茆生一樣癡

太乙真人蓮葉圖

裸裸赤身無寸絲浮浮一葉作兜嬉貪嗔應是全無了
尚有人間半點癡

又

龜巢蓮葉曾千歲仙卧蓮舟今幾年融得幻身無一有
凌風飛去更超然

寄題佑聖觀山水勝處

競說鄧林山水好，獨予未到不能知。
何時了此遊觀債，當為仙人補一詩。

題寒江獨釣圖

二首

柳子當年絕妙詩，現前眼界是真知。
如何想像今人賦，得似當年眼見時。

又

阿誰畫此已成癡，更有癡人為賦詩。
省得南華真玩世，

無何有處覓緇帷

贈黃太初畫魚

南華老仙真畫史有魚橫廣三千里一點化之上青冥
借問何時海風起

晴窓梅影裏聽陳吾道彈琴

慣聽泉聲與松風才出山來耳欲溜一曲千年流水意
只愁無夢到空同

建康西江避暑用滕玉宵韻贈章如山

偶然出郭暫偷閒
政為炎歊倦往還
滿目真山相客主
忽添一客號如山

又

石頭城下看淮山
羨殺白雲終日閒
寄語醉中彭澤令
如何飛倦始知還

贈李放慵

天慵吾友豫章熊
今見宜春李繼宗
彼自天然君自放
兩般頭腦一般慵

贈穿天星翁

向來有術妙通玄談已非宜况敢穿侮慢上靈罪應死
詎能無識為加箋

題內丹顯秘

有序

內丹顯秘者武夷陳虛白以授叅學弟子楊清
遠也為賦絕句

三首

死戶生門出入機中間消息有誰知希夷隱去泥丸顯
何代無人續正支

又

鬼委白人易阜翁瘦癖擬易作參同廣成輕把天機泄
直為膝行趨下風

又

聰惠如頑不浪傳執文泥象豈根原真師密示玄玄處
良賈深藏是至言

題蜂推圖

列戶分房作麼生彌高彌險恣超騰有冠頭上誰為貴

竊食林間謾取憎

又

分封小小幾塵浮忽見哀周十二猴
小大看來俱是幻
岩花山木自春秋

題趙氏先德碑

并序

趙氏魏人也今御史中丞簡之曾大父諱藻金
末為元城令有惠政卒於官吏民懷思為營冢
墓至今號縣家冢云大父諱琛潛德弗耀以孫

貴為贈資善大夫司農卿上護軍追封魏郡公
謚安僖初娶李生一子再娶袁亦生一子不偏
所愛視李之子猶已外值有寇驚以二子寄逃
隣之窟室隣恐兒啼拒不納棄已之子于草間
携李之子以匿寇退草間兒幸無恙衆義而賢
之追封魏郡夫人父諱揖魏郡夫人所生也仕
至承事郎織染司提舉以子貴贈榮祿大夫司
徒上柱國追封魏國公謚敏惠娶李追封魏國

夫人中丞魏國長子也既封贈其祖與父明年
有旨立碑命翰林承旨程鉅夫為文翰林學士
承旨趙孟頫書丹集賢大學士郭貫篆額臨川
吳某讀碑文為作詩六章

曾聞循吏葬桐鄉過者如瞻召伯棠
百里元城遺惠在
縣家墳樹鬱蒼蒼

又

元城茂德世其昌嗣哲韜珍閔弗章
况有閨中賢冢婦

善源深積慶彌長

又

愛兒誰不羨親生奇也履霜祥卧冰倉卒逃生捐所愛
割恩取義有誰能

又

背拋已子抱前兒此事今難古亦稀天鑒昭昭兩全活
故應門戶日光輝

又

幼脫難危長必通平林棄子有郤封莫嗟承事官檔少
身後餘榮爵上公

又

執法明星玉粹溫宦途清譽治乾坤皇仁天廣崇先德
世世公侯魏國公

題朱簿淵采菊圖 二首

絕憐枳棘林端客把玩滎陽菊裏圖儘有南山堪注目
屋低還得舉頭無

又

江南江北兩專城
潯皖齊山古有名
想得此中賢郡佐
庭無人力有詩成

送汪復心致仕得封贈之典歸隱二首

只為浮榮賣了身
天涯多少未歸人
欽承恩命歸休致
獨占紫陽千畝春

又

八十衰翁作計疎
羨君六十早懸車
山中無限幽居樂

老眼猶明好看書

送高郵彭壽伯訓導歸宜春省親

二首

朝莫魚鹽斤海濱
三千里外仰山雲
歸逢里丈驚相問
學比孫秦進幾分

又

樹未經霜葉未丹
不愁遊子客衣單
三年宦學今朝至
得進高堂百倍顏

贈傳省巖道士

有誰夢裏彷彿見識得巖前相是真良相遠孫傳此眼
却將徧閱世間人

題伯時馬

四足追風捷羽翰有誰伯樂是奚官如今萬里青雲步
謾作人間畫卷看

題舜舉馬

近年錢趙二翁死直恐人間無馱馱駘羣裏忽得此
萬里歸來日未西

贈陳曉山相士 二首

陳家風鑑第一人
華山閒處了閒身
既余無分拜庭下
喜有山人亦姓陳

又

六十九歲老相師
八十四翁老見之
從今見後幾度見
度度拈來前度詩

壽全平章

春秋一萬八千指
道德二卷五千言
祝公壽數亦如此

孔老遺芳永永存

答疎山長老茶麝之貺

二首

靜口一啜萬緣空
不數盧仝兩腋風
戰退睡魔成佛道
常惺惺有主人公

又

熱惱紅塵一甌烘
半間雲影送清風
吾州若比襄州勝
城府堪栖老德公

贈玄鶴師

停停十五未婚前耿耿春宵獨自眠多謝有心傳密約
兩情從此得團圓

為游竹州題墨竹

婀娜新梢欲拂雲模糊沙觜舊時痕水平水落渾無定
歲歲龍兒長稚孫

贈相士李樵野

曾省仙棋爛斧柯歸來雙眼閱人多賣薪亦有窮經者
富貴將來定若何

吳文正集卷九十二

欽定四庫全書

吳文正集卷九十三

元 吳澄 撰

五言律詩

贈羅叔厚

并跋

宗塾分重席而翁共一燈人琴兩寂寞裘葛十交承
子能無恙遺經尚有仍談天況精妙門戶速宜興

予昔時嘗同潛心羅貢士於宜川吳氏家塾講授其

子淳老亦從予游潛心死且十年矣而淳老過予能不重予之悲涕乎五言八句寫懷時壬寅三月既望

贈黃醫

并跋

善藥已三世奇功可十全爾能誠浩博此業更精專落
落猶泮統紛紛競蠟鞭因之增慨嘆民命付蒼天

月林黃季卿三世治方藥又能推占尅擇埋葬亦多
技矣吾與之談蓋良醫也然質而無華誠而不偽不
銜嚮以求知而知之者鮮有能而人不知人之慚也

已何尤

別閻承旨

贈篇題欲舊飛剡墨方新鮮
迨百五節睽違十六春
朝廷湏老子館閣著閒身
歲歲山中望文星麗紫宸

次韻吳玄玄道判

半生任耳目景響轉希夷
奄忽流年運噫嗟悟道遲
宗家塵外客餘事世間詩
共泛玄玄海何分海與蠡

送黃學志往京兆迎親

墮地已無父
籲天帝有哀
聞聲急走去
見面早歸來
夜寐不交睫
晝行休問梅
詩囊輕更好
萬里渴心埃

題伏生授書圖

後死寧非數
能言豈必男
如何掌故耳
未了異方談
篇簡僅四七
語音圓二三
可唾千載下
孔傳苦研覃

次韻程簿

鰲石真堪礪
牛刀小試初
已聞三月政
更省一年餘
時雨秧千井
清風壁四隅
絕知公事少
有句下離居

次韻栽禾飯吟 二首

農智專於此雖愚可與能我倉謾充積爾力實依憑
畝基盤布高田梯缺登苦中真樂在鷄遶自如鵬

又

每負素食愧食粗不敢餘惕然存止足庶以老迂踈
飲露貌姑射避煬陽子居炎涼知迴絕日夜勉芸鋤

市山曾貢士挽詩

桂樹秋香老蘆花夜識神百千億身佛六十九年人刀

橫風猷遠堂鱣雨跡陳平生康濟手宰木市山春

吉州司法董廸功哀詩

三首

曾忝榜下士已踰三十年嗟嗟行跡遠忽忽訃音傳哀
緒馳天外閒軀滯日邊歸來成宿草南望涕潛然

又

尚憶甲申歲慙懃荷欵留得追李氏武遍踏古仙邱去
日言重會來期不自由如今千載別此意悵難酬

又

氣岸魁天下詞源湧海濤恢恢容量濶卓卓立心高友
悌古三代朋游今四豪空餘影堂影白首一青袍

贈星禽陳小洲

每見星禽客談形更論情誰云衆飛走得似最靈明蛇
虎類多有鳳麟天靳生超然離六道問子可能名

次韻段錄事審囚勸分

二首

兩間冬蟄久忽忽聽春雷泉脉通枯澤蠹心焚大槐一
番原上雨洗淨燒餘灰收拾神功去東蒙石磊嵬

又

久囚形類鬼衆餓腹鳴雷皎月懸清鏡薰風到綠槐瘦
蘓垂死命炊熟已寒灰但喜多全活何辭馬陟嵬

再韻酬蘭谷贈行之章

立身後孔孟交友尚陳雷生意同春草清陰借夏槐兩
間雙電目萬劫一風灰珍重兼金贈來詩更險嵬

又

天闕生初月江濤吼怒雷日邊雨復霽水裏火焚槐去

去行舟柁溫溫煬竈仄面南瞻斗柄仙嶠峻崔嵬

鄧恕軒哀詩

溪似武陵源吾嘗宿恕軒身無今服飾家有古田園
賈陪賓客恂恂率子孫脫驂猶未遂揮涕望嚴門

送南雄總管之子皮昭德赴京當僦使

豁豁凌公牧天然重厚人公侯宜有子才藝覺無倫異
識超紈綺英猷撼縉紳試能真可續佇俟立通津

鴈峰范處士挽歌

隨會家聲遠陶朱世德蕃一身全盛美百代懿聞孫暇
日詩書府春風花柳園斯人不可見突兀鷹峯存

次韻鄭潛庵

故園花自好官舍草方生聯事期同協來朋喜合并未
應公勇退且聽客留行一木千閭屢支撐速來傾

贈管葬師

滿腹天星妙經年地理師頗聞仙術闕未許世人知犢
鼻山頭蓂鰕鬚水面絲客中談不了重會在何時

送王仲溫郎中之湖廣省

冰水清無滓
邱山重不移
保釐分相業
贊畫得賓師
官柳爭迎舞
甘棠柰去思
書生方卧疾
遙寄數行詩

送富州尹劉秉彛之京

六載心如一
今朝船欲東
我來期數數
公去忽匆匆
別意萬里外
交情片語中
自憐栖病鶴
不得逐長風

送唐教導先生往見鄉先達

謂子將有適
暫此輟絃歌
城市囂塵遠
山林遺逸多
樹

膏蘓隰稻涼意到庭柯為問躬耕稷憂飢思若何

金陵友竹吳君挽辭

二難爭競與一出望齊飛接武年猶壯回頭事已非墓
前題處士泉下得安歸死去偕而季應如造老徽

題學詩堂

十知商賜可三百亦為多而彼解頤者其如墻面何性
情存諷詠倫紀寓絃歌最下能專對猶堪言語科

翁制屬挽詩

大隱居城市今之韓伯休活人深有德利已略無求經
絡傳新考衣冠儼舊游如何未七十吾涕為翁流

送隣人元德之武昌

讀律已三世能詩新有聲忽辭親舍去遠作武昌行江
漢秋風起孫曹故月明舊遊曾感慨送子倍關情

送國子學吳生歸為世大父大父壽

兄弟各耄耄子孫仍衆多善崇三世積祥兆一家和華
髮躋朋壽歡聲入咏歌生歸從爾父綵服共婆婆

送李景仙歸湖南

外省天官屬前朝閣學孫甘心辭顯要雅志便晨昏卓
卓庶能吏堂堂忠孝門此歸得摸楷菊里有鄉尊

題大都姚氏為祈助教辦葬費詩卷

姚氏施雖溥祈生感最深此恩天罔極吾報力難任惠
利周千室歌謠抵萬金曾令采詩者得被管絃音

送大明路儒學正赴任

今日崇文教儒風愧異時朝廷誠有道庠序久無師

矣能言鵠傷哉執飽狸似聞趨古魏倘可愜深期

送梁必大知事之婺州

一見何倉卒相聞已歲年東州文獻後南國俊髦先士
詫蘓湖教郡須岑范賢贊謀倘餘暇為訪牧羊仙

題洪母熊氏墓銘後

堂封已十年孺慕尚囂然執技走天下求詩來日邊顯
揚光淑德題贈富新篇有子能如此應知故母賢

贈楊教授

勅授武昌路醫學教授楊用安存心吾邑左港
大姓也行醫出外已歷三世矣存心用藥治病
之外善診太素脉預定前程休咎壽修短其術
尤異因其過我詩以贈焉

醫業已三世藥功能十全脉精平旦診事測數年前奇
中嗟上巧預知疑佛仙期君還舊里共啟內經玄

贈杏隱車省醫

瑩囊前哲行虎穀後身仙善藥名三世良醫功十全達

官崇禮敬芳問遠流傳陰德須冥報兒孫食萬錢

和劉尚友

挺挺詞林秀栖栖越嶠東幾年淹此鳳何日見猶龍郊
時文中子談遷太史公萬金家寶在昭代定遭逢

贈熊景山造崇仁蓮漏成歸金谿

消長一壺水昇沉百刻籌範圍天用巧舟載地儀浮邑
長政如此國工神與謀四時常不忒春意滿皇州

孤舟李君哀詩 二首

兵後去邑里城中長子孫師模儀郡序客席齒侯門年
壽昔尼父風流今仲元有人紹家學身沒道猶存

又

衮衮詞章偉融融笑語春合并雖不數夢想每相親別
去京華久歸來墓草新遺孤尚哀絰忽見倍傷神

天師留國公哀詩

物外煙霞趣人間雪月身丰姿渾不俗詞翰兩如神一
旦天華隕千年洞草春皇恩在留國愈久愈光新

贈廣昌黃慶甫談葬術

似爾天年未而於地理精雖云師法好亦是性資明前
聖六經在餘功一藝成及時培遠業風翮九霄程

豫章貢院即事奉和雲林提舉晚春閒居舊韻

二首

客裏秋光好歸心不厭遲牆低孤塔見院靜一簾垂隔
紙聞風怒臨堦看日移宛然似三逕未負菊花期

又

晝日間庭步秋雲萬里天眼前俱實際身外一虛船得
意渾忘老論交豈問年此中真樂在不要華山眠

又和張仲美韻

二首

病減食加進神清睡趲遲避風違北牖待月立東垂人
定籟聲寂天旋斗柄移有誰知此意謾說鑄鍾期

又

逍遙知勝地縹緲到鈞天動境風中葉浮生水上船有
形俱待盡無住自忘年萬古中秋月嫦娥夜不眠

與張仲美別仍用前韻

二首

鄉隣應怪我何以獨歸遲
木末芙蓉發簾前果羸垂夜
寒知露重秋老驗星移南浦
今番別重來倘可期

又

已了公家事歸尋小洞天
交吟留別句官辦送歸船
夜月各千里秋風又一年
但當頻寄字惻懇問安眠

美王彥飛父母受贈官

并序

江西省都事太原王彥飛
欽承朝命父贈承直郎

母贈恭人此詩書教子之效也臨川吳某詩以美之

教子勤學禮逢時列縉紳清華躋六品榮寵被雙親遺
像朱衣艷高墳綠樹春報恩嗟罔極聖代勸忠臣

為舒景春賦東舉

東舉種杏者今住杏花村收穀虎衛道銜珠蛇報恩
紅開曉沴草碧驗春溫豈待閒舒嘯栢湖真有孫

奉贈林間上人

方外可誰語林間得此人弗從其師問乃與吾徒親
燦

燦心華現英英辭藻新試拋有為法共了無生因

送國子伴讀李亨受儒學教授南還

夙昔懷知己堂山德義敦恍然驚再世及此見諸孫
胄館五年容公朝一命恩今辰奉檄去光彩照閭門

題唐西平王李氏族譜後

勲業隆先代流波衍後昆西平十五字南土百年孫
節度開今派將軍著古源縉紳從此盛不是出寒門

贈廊庵隱士吳君瑞

瑞也吳同出前無邂逅緣圓機活潑潑方七妙玄玄囊
底儲良相塵中渾隱仙怕人問丹訣只道鍊凡鉛

傅居士挽歌

雲霄成鹿夢湖海老鷗夷樂境游魚在歸舟化鶴隨月
魂迷郢樹風淚濕襄碑多少江南客助歌哀此辭

壬子自壽

昨日辭京國通州岸下船年年此初度度度似今年快
活神仙地懽愉父子天小成重八數圓滿大三千

追補故山長竹坡婁君挽歌

三首

濟濟簪纓胄溫溫瑚璉姿
洛園故衣履商嶺皓鬚耆
友悌天然行溫莊學者師
斯人無復見追憶可勝悲

又

疇昔聯名貢滔滔四十秋
傷哉永離別值我遠遨遊
自嘆歸來晚猶為送往謀
塋期聞已後揮淚洒林丘

又

丹旒荷塘去盈盈挽者歌
不聞薤晞露空想竹緣坡
積

累餘家慶承傳定世科耆年凋落盡哀暮意如何

追補張萬戶挽詩

饗帥開邊釁犇師失國損英雄同一死天地鑑孤貞
裹革骨無朽留皮身有名威靈存廟食過者為吞聲

元榮祿大夫司徒饒國公吳公挽詩

二首

賢父生賢子吾宗有此翁官階躋一品封爵視三公
鄉里名稱異乾坤寵渥隆忽聞哀訃至老淚灑西風

又

公年八十五今去昔何來少賤老能貴生榮死亦哀有
兒依日近為父戴星回天上神仙侶人間經杖屨

玄教宗師張上卿挽詩

化鶴神仙骨游龍道德章風雲千載會日月五朝光身
讓天師號心存宰相方山川效靈異冠劍得深藏

贈裴子晉相士

怪子拋家去歸來非故吾閱人如水鏡知己慎江湖宿
雨添新漲春風滿舊廬匆匆又言別聊為賦驪駒

贈陳可復寫真其人事佛

早辦曹劉伎視之如父兄
青年雖晚出玄思殆天成
離相非求色棲神不待精
誠能參佛解筆下妙花生

吳文正集卷九十三